

## Himmel sei Dank

Kaufmann Mavie

Wenn hosch du es leste Mol innen Himmel gschaug?

Und i muan nit lei so a flüchtiger Blick in die Ferne oder kurz es Wetter checkn. Schaugn obs regnet und ob man die die Gummistiefl außerholn muass. I muan, wenn hosch du es leste Mol innen Himmel gschaug? Direkt noch oben? Wolken beobachtet?

Wenn bis du es leste Mol mit erhobenem Kinn durch die Welt gongen und hosch dir gedenkt, wos fir a Wunder auf der Erde zu leben.

Oft sig i lei meine eigene Wolke. De, de olbm über mir heng und mir a die Sicht auf so viel mehr versperrt. De, de an monche Toge a bissl dunkler und schwarzer isch als an ondere und mi in dicke Nebelschwaden einhüllt. Aus der monchmol helle Blitze schiaßn und so an ohrenbetäubenden Donner auslösen, dass man sich selber nimmer denken hert.

Ich hon gestern innen Himmel gschaug. Innen blauen Himmel, direkt über mir. I hon in Kopf zrug gleg, die Nose noch oben gestreckt und in Blick noch oben grichtet. Monchmol isch es zu hell und mir wern geblendet. Oder Wolken bedecken olles. Ober gestern, gestern hon i innen Himmel gschaug. Meine Wolke isch verpufft. Auf uanmol hon i so viel Klorheit und Faszination gspirt, dass es sich ungfühlt hot, als hatt sich a Knoten in meiner Brust glöst. Unendliche Ruhe hot sich in mir ausgebreitet.

Kuane weiteren Frogen sein aufkemma, de man sich suscht oft stellt. Was lig dorhinter? Wie weit geats no? Wos hot des olles mit mir zu tian? Do wor uanfuch lei Klorheit und Offenheit und die Gewissheit, dass der Himmel jeden Tog der Gleiche isch. Dass er die gonze Welt umschliaßt und mir olle innen gleichn Himmel ai schaugn.

Und sell bring mir unbeschreiblich viel Frieden.

Monchmol gib es uanfuch kuane Frogen, sondern lei die uane Tatsache, wie ruhig der Himmel über ins lig. Es kann stürmen und regnen und schneiben, dor Wind kann oll die Wolken verblosen und die Sunn kann auf ins niederbrennen, ober inser Himmel bleib dor Gleiche.

Und vielleicht isch genau sell die Antwort, de mir olle suachn.